



Dijabetes – Informacije za roditelje i staratelje

Diabetes Information Sheet for Parents and Carers

Obavijestili ste nas da je Vašem djetetu dijagnosticiran dijabetes tipa 1 (type 1 diabetes). Zahvaljujemo se što ste nam pružili tu informaciju.

Mada je glavna zadaća škole da pruži obrazovanje, želimo da Vaše dijete bude sretno i opušteno u školi, kao i da Vi budete sigurni da je Vašem djetetu posvećena odgovarajuća pažnja. Direktor škole će u saradnji s Vama pripremiti individualni zdravstveni plan za Vaše dijete. U nekim slučajevima će direktor trebati dobiti dodatnu podršku nadležnih školskih organa kako bi našli najbolji način da se odgovori potrebama Vašeg djeteta. Ako želite da dijete upišete u školu, ili ako je dijete već upisano, može doći do kraćeg zastoja dok se to obavi.

Kako bismo udovoljili potrebama Vašeg djeteta, škola će preduzeti sljedeće korake:

PRVO - Izrada individualnog zdravstvenog plana

Ovaj plan će obuhvatiti:

- Pojediniosti o djetetovom dijabetesu
- Djetetovu fotografiju
- Aktivnosti koje će škola preduzeti da bi se pomoglo djetetu da u školi kontroliše dijabetes i da se na najmanju mjeru svede rizik od hipoglikemije ili hiperglikemije (odnosno niskog ili visokog nivoa šećera u krvi)
- Dogovor sa školskim osobljem da se pomogne djetetu, npr. pomoć u držanju bolesti pod kontrolom, te osiguranje odgovarajućih posebnih uslova
- Plan za reagovanje u hitnom slučaju
- Vaše kontakt podatke u hitnom slučaju kao i podatke druge osobe ukoliko Vas ne budemo mogli kontaktirati
- Način kako da se fotografija i informacije o potrebama Vašeg djeteta postave na dogovorena mjesta u školskim prostorijama
- Vaš i direktorov potpis, uz napomenu da ste pročitali pojedinosti i da ste i Vi i Vaše dijete bili konsultovani u procesu izrade plana.

Ljekar Vašeg djeteta treba pružiti informacije o vrsti dijabetesa kao i o odgovarajućim lijekovima i tretmanu u hitnom slučaju.

NAPOMENA: Roditelji bi trebali uzeti u obzir vrijeme kad dijete nije pod nadzorom ili brigom škole i da to vrijeme isplaniraju. Na primjer, put do škole i natrag, kao i vrijeme prije i poslije produženog školskog boravka.

DRUGO - Dokumentacija i dostava propisane terapije

Za svaku terapiju za dijabetes koju Vaše dijete treba koristiti, treba predati pismeni zahtjev direktoru, uz koji će biti priloženo uputstvo za primanje terapije. Školi trebate dostaviti lijek(ove) s propisnom naljepnicom kao i potrošni materijal (npr. pribor za testiranje nivoa šećera i olovku za ubrizgavanje insulina).

Zamoliti ćemo Vas da za svoje dijete pripremate pribor za dijabetes da bude spreman za upotrebu svakog školskog dana.

Ukoliko želite da Vaše dijete samo sebi daje terapiju, trebat ćete podnijeti školi pismeni zahtjev. Direktor škole je odgovorna osoba koja će procijeniti da li određeni učenik može sam sebi na siguran način davati terapiju. Kod donošenja ove odluke, direktor može potražiti savjet medicinskog stručnjaka.

Pored toga, škola je dužna da preduzme odgovarajuće korake da osigura da učenik koji sam sebi daje terapiju to čini na bezbjedan način. U situacijama kad učenici nisu dovoljno sazreli ili nisu dovoljno sposobni, odnosno gdje zavise od pomoći odrasle osobe, bit će potreban povećani nadzor nad učenikom.

Tamo gdje su učenici u stanju da sami sebi daju terapiju, treba ih uključiti u izradu procedure za davanje terapije i propisanih lijekova na bezopasan način, jer će njihova saradnja biti od pomoći. Na primjer, neki bi učenici radije dobijali terapiju u svojoj učionici.

Molimo da obavijestite školu ukoliko Vaše dijete nosi medicinsku narukvicu ili ogrlicu za alarmiranje hitne pomoći. Diabetes Australia-NSW preporučuje da svaki učenik s dijabetesom nosi ili jedno ili drugo.

TREĆE - Komunikacija s ljekarom

Škola bi trebala dobiti Vašu dozvolu da u slučaju potrebe može kontaktirati ljekara Vašeg djeteta ili člana stručnog tima za praćenje dijabetesa. Dobit ćete da ispunite obrazac *Ovlaštenje za kontaktiranje ljekara (Authorisation to Contact Medical Practitioner)*.

Telefonska služba tumača

Ako želite dobiti više informacija, molimo da kontaktirate direktora škole.

Ukoliko Vam je potrebna pomoć tumača, molimo nazovite Telefonsku službu tumača na broj 131 450 i tražite tumača za svoj jezik. Službenik na centrali će nazvati školu i povezati Vas s tumačem na vezi koji će Vam tumačiti prilikom razgovora. Ova usluga se ne naplaćuje.

Potvrda. Ovaj materijal je sačinjen uz pomoć organizacije Diabetes Australia-NSW.
